

ասպարեզը մնաց յոյներին: – «հոյնը անհաւատարիմ է», ասում է թուրքը, եւ նրա վրայ վստահութիւն չունի, նրան գործ չէ յանձնում: Դա իրաւ է: Որովհետեւ յոյնը այնքան մեծամիտ է, որ նա չէր կարող հայի պէս իրան այնքան ստորացնել, որ կարող լինէր հաշտուել իր աստելի թշնամու հետ, – իր երկիրը տիրողի եւ իր ազգակիցներին ստրկացնողի հետ: Այս պատճառով յոյն դրամատերերը չուզեցին ամիրաներ, սառաֆներ եւ տերութեան կապալառուներ դառնալ: Նրանք ձեռք առին ազատ վաճառականութիւնը, սկսեցին երկրի արդիւնաբերութիւնը դուրս հանել եւ դրսից ներս բերել: Եւ ահա այսօրոպ օրում Տաճկաստանի ընդարձակ վաճառականութիւնը նրանց ձեռքումն է:

– Բայց հայերը բոլորովին զուրկ չեն վաճառականութիւնից, – կտրեցի եւ Ասլանի խօսքը:

– Այն քո տեսածը վաճառականութիւն չէ, – պատասխանեց նա, – այն մի տեսակ վաշխառութիւն է, որով պարապում են հրեաները: Վեր առնենք, օրինակ, Վանայ նահանգը, որը ձեզ փոքր ի շատե ծանօթ է, քննելով այստեղի վաճառականների գործունեութիւնը, դուք կը տեսնէք միեւնոյնը, ինչ որ անում են մայրաքաղաքներում մեր խոշոր դրամատերերը: Չանազանութիւնը միայն նրանումն է, որ դրանք մանր հարստահարողներ են, այլ խօսքով, փոքրիկ աւազակներ են, իսկ նրանք – մեծ: Մեր գիւղացիները միշտ փողի կարօտութիւն ունեն հարկեր վճարելու համար եւ այլ կենսական պահանջների համար: Փողը նրանք ստանում են վաճառականից, ի հարկէ, ծանր տուկոսներ վճարելով: Գիւղացիները նոյնպէս պարտքով գնում են վաճառականից իրանց տան, հագուստի եւ այլ հարկաւորութեանց վերաբերեալ իրեղէնները: Գալիս է պարտքը վճարելու ժամանակը. գիւղացին փող չունի որ տայ, վաճառականը յափշտակում է նրա բոլոր երկրագործական արդիւնքը կէս գնով: Այսպիսի աւազակները կը ցանկանան, որ գիւղացու վիճակը բարւոքի, կը ցանկանան, որ նա փողի կարօտութիւն չունենայ: Աւելացնենք դրա վրայ քրդի, թուրքի, տերութեան հարկահանների հարստահարութիւնները. – խեղճ գիւղացին ինչո՞վ կարող է այս բոլորին բաւականութիւն տալ: Նրա երկրագործութիւնը դեռ իր նահապետական ձեւի մեջն է, աւելի արդիւնք չէ տալիս: Նա արհեստ չգիտէ, որ իր ձեռքի արդիւնաբերութիւնը մշակոած կերպով վաճառահանէ դէպի օտար երկրներ: Այլեւս ինչո՞վ կարող է նա իր ընտանիքը պահել, երբ իր աշխատութեան այն փոքրիկ վաստակն եւս ձեռքիցը խլում են: Ահա այստեղից է ծագում այն տխուր երեւոյթը, որ մեր ժողովուրդը հայրենի հողի վրայ իր ապրուստը ճարելու հնարներ չունի: Նրա աշխատութեան արդիւնքը նրա ձեռքից խլում են. նա մնում է միշտ աղքատ եւ միշտ առանց հացի, եւ այդ պատճառով ստիպուած է թողնել հայրենի հողը եւ